




Մ Ա Յ Ր Ա Թ Ո Ռ Ո Ւ Մ

Հոկտեմբերի 30-ին, ուրբաթ.—Այսօր Վեհափառ Հայրապետից և Մայր Աթոռից հրաժեշտ է առնում տ. Ղևոնդ արքեպ. Չեպելյանը, որը շուրջ մեկ և կես ամիս ուխտավորաբար գտնվում էր ս. Էջմիածնում և մայր հայրենիքում, և մեկնում Բելրուս:

*
* *

Հոկտեմբերի 30-ին, ուրբաթ.—Այսօր, երեկոյան ժամը 18-ին, Վեհաբանում տեղի է ունենում Գերագույն հոգևոր խորհրդի հերթական նիստը՝ Վեհափառ Հայրապետի նախագահությամբ: Ժողովին մասնակցում էր նաև ուխտավորաբար Մայր Աթոռում գտնվող տ. Սերովբե արքեպ. Մանուկյանը:

*
* *

Հոկտեմբերի 31-ին, շաբաթ.—Այսօր, ժամը 15-ին, հոգևոր ճեմարանում իր երրորդ դասախոսությունն է կարդում բժիշկ Ստեփան Տեր-Ստեփանյանը: Հարգելի բանախոսի նյութն էր՝ «Մարդու անատոմիան»:

*
* *

Նոյեմբերի 1-ին, կիրակի.—Այսօր Մայր տաճարում ս. պատարագ է մատուցում Ռոստովի հայոց հոգևոր հովիվ տ. Գրիգորիս արեղա Բունիաթյանը: «Հայր մեր»-ից առաջ քարոզում է «Մայր իմ և եղբարք սոքա եմ, որ զբանն Աստուծոյ լսեն ու առնեն» քննաբանով:

Ս. պատարագին ներկա էր Վեհափառ Հայրապետը:

*
* *

Նոյեմբերի 4-ին, չորեքշաբթի.—Այսօր Վեհափառ Հայրապետը, տ. Սերովբե արքեպ. Մանուկյանի ընկերակցությամբ, մեկնում է Դիլիջան՝ տեղի առողջարանում եռօրյա հանգստի համար: Վեհափառ Հայրապետը և տ. Սերովբե սրբազանը Մայր Աթոռ են վերադառնում նոյեմբերի 7-ին, շաբաթ օրը:

*
* *

Նոյեմբերի 8-ին, կիրակի.—Այսօր Մայր տաճարում ս. պատարագ է մատուցում տ. Հակոբ քհն. Հակոբյանը: «Հայր մեր»-ից առաջ քարոզում է Վեհափառ Հայրապետը՝ նախորդ օրվա Հրեշտակապետաց տոնի առթիվ:

*
* *

Նոյեմբերի 10-ին, երեքշաբթի.—Այսօր, ժամը 19-ին, Վեհարանի հանդիսությանը դահլիճում Մայր Աթոռի միաբանությանը, հոգևոր ճեմարանի ուսանողությանը և դասախոսական կազմին ու պաշտոնեությանը դասախոսություն է կարդում բժշկական գիտությունների դոկտ.-պրոֆ. Ա. Ծաղարյանը՝ Պետրոս Դուրյանի դիմաքանդակի վերականգնման իր աշխատանքների մասին:

Բանախոսությունից հետո Պետրոս Դուր-

յանի ստեղծագործական կյանքի և վաստակի մասին զեկուցում է բանասիրական գիտությունների թեկնածու Ալբերտ Շարությունը:

Նոյեմբերի 13-ին, ուրբաթ.—Այսօր Բելյուսից Մայր Աթոռ է ժամանում Ռումինիայի և Բուլղարիայի թեմերի հայոց առաջնորդ տ. Տիրայր եպս. Մարտիկյանը: Նա Երուսաղեմում մասնակցել էր եպիսկոպոսաց հանձնաժողովի աշխատանքներին՝ որպես անդամ:

Նոյեմբերի 14-ին, շաբաթ.—Այսօր Փարիզ՝ իր թեմն է վերադառնում Արևմտյան Եվրոպայի հայրապետական պատվիրակ և Ֆրանսիայի հայոց առաջնորդ տ. Սերովբե արքեպ. Մանուկյանը:

Նոյեմբերի 15-ին, կիրակի.—Այսօր Մայր տաճարում ս. պատարագ է մատուցում տ. Նշան քնն. Բելյուսյանը: Քարոզում է Ռումինիայի և Բուլղարիայի առաջնորդ տ. Տիրայր եպս. Մարտիկյանը՝ հայ եկեղեցու դերի և առաքելության մասին հայ ժողովրդի կյանքում:

Ս. պատարագին ներկա էր Վեհափառ Հայրապետը:

Նոյեմբերի 18-ին, չորեքշաբթի.—Այսօր, առավոտյան ժամը 11-ին, Վեհափառ Հայրապետին է այցելում տաղանդավոր գրող Մարիետա Ծահինյանը, որը Հայաստանի 50-ամյակի առթիվ գտնվում էր Երևանում:

Հայոց Հայրապետի և հարգելի գրողի միջև տեղի է ունենում հետաքրքիր զրույց՝ հայ կյանքի ու հայ մշակույթի վերաբերյալ:

Նոյեմբերի 20-ին, ուրբաթ.—Այսօր ուխտավորաբար Մայր Աթոռում գտնվող Ռումինիայի և Բուլղարիայի թեմերի առաջնորդ տ. Տիրայր եպս. Մարտիկյանը մեկնում է Բաքու՝ ս. պատարագ մատուցելու և Բանին կենաց քարոզությանը միախառնելու հավատացյալներին: Տ. Տիրայր սրբազանին ուղեկցում էր Արարատ սրկ. Գալստյանը: Սրբազանը Մայր Աթոռ է վերադառնում նոյեմբերի 23-ին, երկուշաբթի օրը:

Նոյեմբերի 20-ին, ուրբաթ.—Այսօր, ժամը 19-ին, Վեհափառի դահլիճում տեղի է ունենում ասմունքի երեկո, որին ներկա էին Վեհափառ Հայրապետը, Մայր Աթոռի միաբանությունը, հոգևոր ճեմարանի դասախոսական կազմը, ուսանողությունը և Մայր Աթոռի պաշտոնեությունը:

Ելույթ է ունենում Հայկական ՍՍՀ ժողովրդական արտիստ, պետական մրցանակի դափնեկիր, Մոսկվայի պետական ֆիլհարմոնիայի մենակատար, ասմունքող Սուրեն Քոչարյանը: Համբավավոր արվեստագետ մեծ վարպետությանը արտասանում է Հովհաննես Թումանյանի «Մարտ», «Հառաչանք» պոեմները և հատվածներ «Անուշ»-ից: Երկրորդ մասում տաղանդավոր ասմունքողը կարդում է երգիծական պատվածքներ Ա. Բակունցից, Հովհ. Թումանյանից, Հ. Ծողուրյանից և ժողովրդական այ հեքիաթներ: Ելույթի ավարտից հետո Վեհափառ Հայրապետը իր ընդունելությանը դահլիճում ջերմ շնորհակալություն է հայտնում Ս. Քոչարյանին՝ բարձրորեն գնահատելով նրա կատարողական արվեստը:

Նոյեմբերի 22-ին, կիրակի.—Այսօր Մայր տաճարում ս. պատարագ է մատուցում տ. Ծնորհք վրդ. Գաապարյանը և քարոզում՝ Սկույսի տաճար ընծայման տոնի առիթով «Այստեղ երանհիցեն ինձ ամենայն ազգք» բնաբանով:

Նոյեմբերի 28-ին, շաբաթ.—Այսօր, ժամը 19-ին, Վեհափառ Հայրապետին են այցելում Հայաստանի 50-ամյակի առթիվ մայր հայրենիք ժամանած մի խումբ տիշուրա-հայ մտավորականներ, հասարակական գործիչներ, այդ թվում՝ Բելյուսից՝ պրոֆ. Բ. Թովմապանը իր հարգելի տիկնոջ հետ «Զարթոնք» թերթի խմբագրապետ Գ. Ահարոնյանը, Եթովպիայից՝ Հայկաշեն Ուգունյանը, Եգիպտոսից՝ ծանոթ արվեստագետ Ալեքսանդր Սարուխանը, «Արև» թերթի խմբագրապետ Ավետիս Յափուջյանը ԱՄՆ-ից՝ «Պայքար» թերթի խմբագրապետ ղոկտ. Նուբար Բերբերյանը և ուրիշներ: Հայոց Հայրապետի և հարգելի հյուրերի միջև տեղի է ունենում ջերմ զրույց:

Վերջում Վեհափառ Հայրապետը բարեհաճում է Իրեն սեղանակից դարձնել հարգելի հյուրերին:

Նոյեմբերի 28-ին, շաբաթ.—Տոն Սրբոց առաքելոցն և առաջին լուսաորոշացն մերոց Թաղէոսի և Բարթողիմէոսի.

Այսօր Մայր տաճարում օրվա տոնի առիթով պատարագ է մատուցում տ. Մուշեղ վրդ. Պետիկյանը:

Նոյեմբերի 28-ին, շաբաթ.—Այսօր հոգևոր ճեմարանի ուսանողությունը, տեսչի գլխավորությամբ, այցելում է Սարդարապատի հուշարձանախումբ: Նրանք ծանոթանում են Սարդարապատի հերոսամարտի պատմությանը և հուշարձանների կառուցողական արվեստին:

Նոյեմբերի 29-ին, կիրակի.—Այսօր, ժամը 15-ին, Հայաստանի 50-ամյակի առիթով, Վեհարանում, Վեհափառ Հայրապետի մախազահությամբ, տրվում է ճաշկերույթ, որին ներկա են լինում տ. Հայկազուն, տ. Կոմիտաս, տ. Հուսիկ, տ. Տիրայր սրբազանները, Արարատյան, Ծիրակի, Վրահայոց, Ադրբեջանի թեմական և եկեղեցական խորհուրդների, Գերագույն հոգևոր խորհրդի, Վերստուգիչ հանձնաժողովի, «Էջմիածին» ամսագրի խմբագրական կազմի անդամները:

Ընդունելության ժամանակ հայրենասիրական ջերմ ելույթներով հանդես են գալիս Վեհափառ Հայրապետը, տ. Հայկազուն և տ. Մաշտոց սրբազանները, տ. Ծնորհք վրդ. Գասպարյանը, Արարատյան թեմի թեմական խորհրդի ատենապետ Ս. Արևշատյանը և ուրիշներ:

Ճաշկերույթն ավարտվում է խմբովին երգված «Էջ Միածինն ի Հօրէ» շարականով և հայրապետական օրհնությամբ:

Նոյեմբերի 30-ին, երկուշաբթի.—Այսօր, առավոտյան ժամը 11-ին, Վեհափառ Հայրապետին է այցելում տաղանդավոր երգահան Արամ Խաչատրյանը:

Հայոց Հայրապետի և հոշակավոր երգահանի միջև տեղի է ունենում ջերմ գրույց՝ հայ երաժշտության և հայ մշակույթի վերաբերյալ հարցերի շուրջ:

Նոյեմբերի 30-ին, երկուշաբթի.—Այսօր Վեհափառ Հայրապետին են այցելում Հայաստանի 50-ամյակի առթիվ Երևանում գտնվող Իրանի սենատոր Սադեկ Ռեզա Զադե Ծաֆակը և Թեհրանի համալսարանի դասախոս ու Մեջլիսի անդամ Գագիկ Հովակիմյանը:

Ամենայն Հայոց Հայրապետի և հարգելի հյուրերի միջև տեղի է ունենում ջերմ գրույց:

